

# UPM bangunkan Putra Virtual ID

**KUALA LUMPUR 5 Sept.-** Universiti Putra Malaysia (UPM) membangunkan aplikasi pengenalan diri dikenali sebagai Putra Virtual ID untuk menjadikan universiti tersebut sebagai kampus digital.

Timbalan Naib Canselor (Akademik dan Antarabangsa) UPM, Prof. Dr. M. Iqbal Saripan (**gambar**) berkata, aplikasi pengenalan diri di telefon pintar bagi pengguna Android dan IOS serta laman web itu mengandungi semua maklumat pengenalan diri seperti nama, gambar dan nombor pengenalan pelajar.

“Warga UPM akan menggunakan kod respon pantas (QR) dalam telefon pintar masing-masing bagi menguruskan pengenalan diri semasa menggunakan kemudahan terdapat dalam kampus seperti di dewan kuliah, perpustakaan dan bas.

“Dalam menjadikan UPM sebuah kampus digital, kami akan memperkembangkan lagi untuk semua kegunaan seperti pembelian, uru-



san kolej kediaman, kehadiran kelas dan sebagainya,” katanya ketika ditemui di sini, hari ini.

Yang turut hadir ialah Naib Canselor UPM, Prof. Datin Dr. Aini Ideris.

M. Iqbal turut berkata, kod QR boleh ditukar oleh pelajar dan kakitangan UPM bagi menjamin tahap keselamatan maklumat diri daripada disalahgunakan oleh orang lain.